

Rinforzar finanziain las scolas medias privatas

La regenza ha respundì a la incumbensa da deputà Heinrich Berther (pcd Cadi)

DA MARTIN CABALZAR

■ **La regenza è pronta d'acceptar l'incumbensa parlamentara da deputà Heinrich Berther (pcd Cadi) che prenda in rinforz dal sustegnim chantunal a las scolas medias privatas. Ellas duain vegnir sustegnidas egualmain a la scola chantunala ma-nada dal chantun.** Tenor la constituziun chantunala è il chantun cumpetent e responsabel per l'instrucziun en la scola media. El po manar sez u sustegnair talas scolas privatas. En quest connex sto el er observar ina purschida decentrala da scolas medias. Il chantun facilitescha la frequentaziun da las scolas medias privatas cun conceder a quellas contribuziuns annualas. Questas contribuziuns annualas per scolar correspundan als custs nets ch'il chantun sto pajar per in scolar che frequenta la scola chantunala grischuna. Per calcular quests cuosts vegnan fin qua era resguardadas las expensas per la construcziun e renovaziuns complessivas e per l'engrondiment dals stabiliments da scola cun ina pauschala d'investiziun da nov pertschient dals custs da gestiun nets.

Passa 20 000 francs per scolar

Sco quai che deputà *Heinrich Berther* constatescha han ils custs annuals per scolar muntà 2011 a la scola chantunala a 24 114 francs. La contribuziun a las scolas medias privatas importia peruncunter mo 21 645 francs. Quai correspunda ad ina differenza da 2469 francs (= 10,24%). Questa gronda differenza saja sa resultada perquai ch'ils custs d'investiziun per sanar la scola chantunala n'èn betg vegnids resguardads en las contribuziuns a las scolas medias privatas.

Deputà Berther constatescha plinavant: «Il rinforz da las scolas medias privatas sco lieu d'instrucziun interessant era per scolaras e per scolaras extrachantunals ed esters dat al Grischun in'at-

tractivitat supplementara sco lieu economic.» I stoppia pia esser en l'interess dal chantun che las scolas medias possian sa basar sin bunas cundiziuns generalas e ch'ellas na vegnian betg impedidas tras restricziuns nunnecessarias. Perquai supplitgescha deputà Heinrich Berther, sustegnì da 93 consegnonts, la regenza da preschentar al cussegl grond entaifer in onn ina missiva ed ina proposta per reveder la lescha davart las scolas medias. sco suonda:

– La fixaziun da la contribuziun a las scolas medias privatas sto correspunder da nov en ses import als custs da la scola

chantunala incl. las investiziuns. Plinavant ston vegnir resguardads ils giavischs da la moziun Bischof.

– Las scolas medias privatas ston vegnir sustegnidas en lur libertads d'interpresa sch'ellas stgaffeschjan purschidas attractivas.

Malgrà ch'il cussegl grond haja acceptà l'october 2002 cun 97:0 vuschs ina moziun Bischof concernent la nova regulaziun da las contribuziuns chantunals a las scolas medias privatas en furma d'in postulat na saja quel anc betg vegnì realisà, constatescha deputà Heinrich Berther en sia intervenziun parlamentara.

La regenza respunda

La regenza constatescha che la moziun Bischof saja vegnida inoltrada d'in temp nua che las cundiziuns generalas per calcular las contribuziuns chantunals a las scolas medias sa midavan permanentmain. En il decurs dals onns suandants hajan differents facturs influenzà decisivamain l'adattaziun da las contribuziuns chantunals sco il nov urden da maturità, l'examinaziun da las structures e prestaziuns per sanar las finanzas, la realisaziun e sanaziun da differents edificis da la scola chantunala etc.

Plinavant sajan er ils custs per scolar

da la scola chantunala pli bass ch'ils custs che vegnivan indemnisads effectivamain per las scolas medias privatas. La differenza na saja betg d'attribuir a las investiziuns architectonicas, mabain pli-tgusch a differentas adattaziuns dals principis da contabilitad. Cur che las lavurs da sanaziun vi da las differentas imobiglias da la scola chantunala sajan terminadas stettian a disposiziun datas actualas per calcular da nov la quota d'investiziun.

Pauschalas per scolar creschan

Sco la regenza constatescha èn las pauschalas annualas per scolar creschidas da 2010 fin 2013 da 21 564 sin 23 037 francs. La contribuziun totala è creschida en il medem temp da 31,7 milliuns sin 32,4 milliuns. La pli pitschna differenza è d'attribuir cunzunt a la digren da scolar en las scolas medias privatas.

Las lavurs per calcular da nov las contribuziuns a las scolas medias privatas ed in'actualisaziun da la contribuziun d'investiziun sajan già vegnidas instradadas 2012 entaifer l'administraziun e la revisiun da la lescha da scolas medias vegnia preparada.

En quest connex punctuescha la regenza che las scolas medias sajan sco interpresas privatas libras en lur gestiun. Concernent lur purschida da scolaziun sco era concernent las premissas d'admissiun e da promoziun stoppian ellas dentant observar las directives da la legislaziun. Aschia stoppian las disposiziuns d'admissiun e da promoziun da las scolas medias privatas correspunder a talas da la scola chantunala grischuna. Quai muntia che ils scolaras extrachantunals ed esters stoppian avair in'autorisaziun da lur chantun resp. pajais d'origin per dastgar frequentar la partiziun giavischada da la scola media. En quest senn è la regenza pronta d'acceptar l'incumbensa da deputà Heinrich Berther.



Tenor constituziun ha il chantun da procurar per ina purschida decentrala da scolas medias en las regions.

MAD